

03 NOV 2001

Asean-Pengganas

DEKLARASI ASEAN DIJANGKA TIDAK MENYENTUH SERANGAN AMERIKA

Oleh: David Chelliah

BANDAR SERI BEGAWAN, 3 Nov (Bernama) -- Para pegawai kanan Asean dijangka tidak memasukkan seruan supaya perikatan yang diketuai oleh Amerika menghentikan pengeboman di Afghanistan dalam Deklarasi Asean Bagi Membanteras Keganasan Antarabangsa.

Para pegawai kanan yang sedang membuat persiapan bagi Sidang Kemuncak Asean Ketujuh pada Isnin berkata, negara tuan rumah Brunei telah menyiapkan rangka tindakan deklarasi itu ekoran cadangan awal daripada Filipina.

Bagaimanapun, Filipina tidak meminta Amerika menghentikan pengeboman itu dan sebaliknya hanya mengutuk serangan pengganas di New York dan Washington pada 11 Sept.

Sebaliknya Malaysia dan Indonesia telah berulang kali meminta Amerika supaya menghentikan dengan segera serangan terhadap Afghanistan tetapi Filipina dan Singapura, sekutu kuat Amerika berkecuali dalam hal itu.

Melihatkan kedudukan itu, seorang pegawai kanan Thai berkata deklarasi Asean tidak akan menyatakan dengan khusus serangan udara oleh Amerika di Afghanistan.

"Saya tidak berpendapat kita akan merujuk kepada mana-mana negara tertentu dalam deklarasi tetapi sebaliknya satu deklarasi demi kebaikan bersama Asean untuk melawan keganasan," kata beliau lagi.

Bagaimanapun, seorang lagi pegawai kanan berkata, negara-negara individu Asean dan rakan-rakan dialog Asean -- China, Jepun dan Korea Selatan mungkin muncul dengan kenyataan berasingan mengenai serangan udara Amerika terhadap Afghanistan.

Malaysia telah mencadangkan yang satu persidangan antarabangsa mengenai keganasan dan punca keganasan dimasukkan dalam deklarasi itu.

"Kita sedang menekankan supaya dua faktor ini dimasukkan dalam deklarasi itu," kata seorang pegawai kanan Polis Diraja Malaysia.

Perdana Menteri Datuk Seri Dr Mahathir Mohamad telah berkata yang isu Palestin dan konflik Asia Barat adalah antara punca utama keganasan.

Pegawai itu juga berkata yang satu cadangan untuk menganjurkan mesyuarat Menteri-menteri Dalam Negeri Asean mengenai jenayah merentasi sempadan menumpukan pada pengganas diadakan di Kuala Lumpur awal tahun depan.

Draf awal deklarasi itu antara lain mengandungi respons kolektif Asean terhadap seruan Pertubuhan Bangsa-bangsa Bersatu (PBB) supaya masyarakat antarabangsa melawan semua ancaman terhadap keselamatan dan keamanan antarabangsa yang disebabkan oleh pengganas.

Selain itu mengesahkan komitmen Asean untuk menyertai perikatan anti pengganas antarabangsa dan untuk berusaha bersama PBB bagi membawa mereka yang bersalah kerana melakukan, menaja atau membantu serangan pengganas.

Juga untuk mengkomit negara-negara Asean mengambil langkah-langkah khusus bagi memerangi keganasan.

Pemimpin-pemimpin Asean dan rakan-rakan dialog mereka akan memulakan sidang kemuncak dua hari itu bermula Isnin.

Asean terdiri daripada Brunei, Kemboja, Indonesia, Laos, Malaysia, Myanmar, Filipina, Singapura, Thailand dan Vietnam.

-- BERNAMA

DC PR